



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tir_yimym



tir yimym

TAPAK 7

**Odisha tzumetsung lendong
nung asur 13 jungogo**

**Imran Khan mozü kidangi anir
aotsü Supreme Court-i tuyuogo**



VOL. XXIII ISSUE NO. 307 (ADOK 307) DIMAPUR RASEMNÜ (WEDNESDAY) LUROI (AUGUST) 19, 2026

₹ 5.00

NSF aser WCH-i asukhu lemsateper

Dimapur, August 18 (TYO): Naga Students' Federation-i sangdong ka ajanga August 18 nü Eno Niketu Iralu asüba osang angashia mang ayimba metetdaksüogo.

Asür Eno Niketu Iralu-i pa taküm ya Naga nunger yimjung, ochi obendang, meraket aser longjemdaksütsü atema bendanga agüja inyaka aruogo.

Pai Naga nunger yimjung atema maparen nung teyari agütsüba aser sensaksem, tangatetep aser telongjem atema nokdakba ya asen puti otsü nung kanga tongtibang shilem ka asütsü.

Pa taküm ajanga chichiba lenisüba ya jenjang mesüra tashi agi masadanger, saka tenzütsü atema mulunga aliba, taküm tenla agütsütsü aser nübortem ajak ajangzükdaksütsü atema inyakba agi asadanger ta sayuogo.

NSF-i Naga nunger ajak den pa nem tetushi agütsür. Pa asenok nungi pila oaka pai inyaka toktsüba mapa tajungtem ajanga asenok maneni ajungmesotsü.

Mangyim jashi tia nung aliba mapang onoki asür kinunger, adianu, tembar aser pa meteta alir ajak den asukhu lemsateper. Pa

mapa tajung agi aika dak kongshiogo ta meteta parnok anisungzüik angutsü imla atar, aser pa mapa tajung ya Naga nungertemi tenügsang agüja bilemtetsü.

Asür Eno Niketu Iralu mapang iba lima nungbo tembangogo, saka pa mapa tajung teti liyonga aotsü, ta NSF-isa metetdaksüogo.

Western Chakhesang Hoho (WCH)-ia sangdong ka nung Niketu Iralu süba atema temlung raksaba metetdaksüogo.

Asür Iralu ya peace activist ka dang masü, yimjung yanglur, lokti melenshir, kaketzülur aser aika ajangshia aruba aser shisa akaba ola ka liasü ta WCH-i ashi.

Pa ya Naga loktiliba nung sentilung ka liasü aser pai shilem tajung agia aruba ajanga nisungtemi akhümtsüba aser agizük. Pa indang senmang tulutibaji pai kongshiba takütem nung teti alitsü kechiyong pai yimjung, akhüm aser kati ka asoshi külem tebilemtsü khuret indang jembia aru ta WCH-isa ashi.

Pa asüba ya Naga peace movement nung dang masü saka Naga loktiliba nung ongdang tulu ka toktsür ta parnokisa ashi.

Education Minister-i NTA melenshir

New Delhi, August 18, 2026 (Agencies): Education Minister Pralhad Joshi-i National Testing Agency (NTA) khenyongi melenshi tetuyuba agütsüogo aser iba kübok experts 600 tashi agientsü aser four-tier question paper checking system benoktsü.

"Experts 600 agienogo aser experts tasen anioka examination team melenshir" ta Ministry of Education-i metetdaksüogo.

Külen, taruba hopta ana-ase

ka tsüngda ketdangsür 20 nungi 25 shi shimoktsü aser taruba anogotem maneni ketdangsür talila shimoktsü.

Ministry-isa NTA indang office tem nung security akangshir aser CISF teams ajanga security tashitaitba kümdaksütsü.

India nung NTA ajanga JEE (Main), NEET (UG), CUET (UG) aser UGC-NET densema major entrance aser eligibility examinations ketdangsüa agir.

DAKT nung kaketshirtem tenüng zülüoker

Dimapur, August 18, 2026 (TYO): Delhi-NCR region nung class 7 nungi tema azüngba Aor kaketshirtemi academic year 2026-2027 atema Delhi Ao Kaketshir Telongjem (DAKT) nung tenüng zülüoktsü metetdaksüogo.

May 13, 2026 nungi registration asü tenzüko aser Züngsem tasentem (Freshers) & Existing Members (Renewal) shiai Rs 350 agütsür tenüng zülüoktsüla ta DAKT Tir Purlemba Jamir aser Tongti Tezülur Imtiyala Aier nati sangdong ka nung shiogo.

DAKT Temzüng nung Arrla VI nung aliba ama Delhi-NCR region nung Class 7 nungi tema Aor kaketshir ajaki tenüng zülüoktsüla. Iba tetuyuba kübok school kaketshirtem, college/university kaketshirtem aser mapa inyakba kaketshirtem (Delhi-NCR nung shisaliok atema

alirtem) ajak adener ta DAKT mendenpurtemisa ashi.

DAKT nung tenüng zülüoka maliba kaketshirtem asoshi onoki tebilemtsü khuret mabentsü aser DAKT ajanga teyari agütsüba kecha mangutsü ta parnokisa ashi.

Iba dak sendakba osang metetpelatsü atema Kr. Tiano Longkumer (Statistics Secretary) : +91 6009098538, Kr. Sungjemmenla Jamir (Asst. Statistics Secretary) : +91 7303622278, Kr. Taochila Pongener (Information & Publicity Secretary) : +91 8794836621 aser Kr. Arenmenla Pongener (Asst. Information & Publicity Secretary) : +91 8118915110 nunger den tongteptsü akok.

Iba link ajanga DAKT nung tenüng zülüoker:

HTTPS://FORMS.GLE/IDVZXUKXXHHBDVMS8

Governor Nand Kishore Yadav-i Longwa Village semdang



August 18, 2026 nü Rajya Sabha MP Phangnon Konyak aser Longwa nung Chief Angh Tonyei Konyak nungeri Nagaland Governor Nand Kishore Yadav pelashishia agizükdang agiba noksa ka angur.

Dimapur, August 18, 2026 (TYO): Nagaland Governor Nand Kishore Yadav-i August 18, 2026 nü Mon district kübok Longwa Village semdangogo.

Governor Yadav den külemi Commissioner & Secretary to Governor, Thavaseelan K. IAS, Fiirhesie Nyuwi aser tanga ketdangsürtem liasü.

Tanü COB Longwa 42 Assam Rifles helipad, Mon District nung Mon Deputy Commissioner Wennyei Konyak, NCS, Superintendent of Police, MP Rajya Sabha Phangnon Konyak, Advisor, Konngam Konyak aser Longwa nung Chief Angh Tonyei Konyak nungeri Governor pelashishia agizük.

Longwa Chief Angh'er kidang nübortem den jembidang Governor Yadav-i Konyak nunger

den ajurutepa sensaksemba aser külemi kazütsü mapang anguba ya maongka ka lir ta ashi.

"Tawa Mon nung alima lendong tulu atalokba ajanga timtem aser khuret bentsür aruogo. Iba lendong nung nising takütem samaoogo aser takoksa jenti nguogo. Nagaland nung alir ajak tenüng nung tasür kibongtem den mangyim lemsateper" ta Governor Yadav-i ashi.

"District Administration, NSDMA, SDRF, Police security forces, line departments, civil society organisations, arogotem, lanur teloktem aser volunteers-i lendong nung kanga tasü itta aser bendanga agüja yaritepba atema tenügsang agütsür. Nenoki search & rescue, evacuation, relief & restoration nung nübo

agüja yariba ajanga telongjem aliba sayuogo" ta paisa ashi.

Mon nung alirtem aser Konyak nungeri iba mapang tamajung nung külemi noktakba atema tenügsang agütsür aser lokti külemi noktakba, aria bilemba aser kati ka yaritepba ya Nagaland nung tashi tulutiba rongnung ka lir ta Yadav-isa ashi.

Lendong atalokdang relief & rescue ya kanga tongtipang saka iba sülen rehabilitation & reconstruction-a kasa tongtipang lir. Sorkar aser nübortem külemi yaritepa district yanglushitsüla aser kiojen samaba kibongtem yaritsüla ta paisa metetdaksü.

Centre aser State sorkartemi maneni relief, restoration aser rehabilitation atema teyari agütsütsü ta Governor Yadav-isa shisem.

Iba sentong nung Konyak Union President Yamao Konyak-i Governor aser pa meina arur ajak dang pelaba ashi aser July 19, 2026 nü anentsüh aser tzumetsung ajanga takoksa bentsür aruba osang tatsüka lemsatep.

Konyak Students' Union (KSU) President Temwang Konyak-ia o jembidang anentsüh aser tzumetsung ajanga School 7 aser kaketshir 318 nem timtem agütsüba indang ashi.

Longwa Village nung Chief Angh Tonyei Konyak-i Governor aser par teloki semdangba atema tenügsang agütsü.

"Asenok asoshi tayongzükbä tulutiba rongnung Longwa Village nung infrastructure yanglushitsüba lir anungji sorkari lenmang ajungkettsü mepishir" ta Chief Angh Tonyei Konyak-i ashi.

Yimjung yanglur aser putepshitsü ajungmesor Niketu Iralu süogo

Dimapur, August 18, 2026 (Agencies): August 18, 2026 nikongdang Naga peace activist aser lokti lennir Niketu Iralu alima nungi pilaogo.

Niketu Iralu temulungjang nung timtem ka adokba sülen BLK Hospital, New Delhi nung anioka anepaludang pa arishi tembang.

Iralu ya Nagaland nung yimjung aser putepshitsü atema ola adoker tongti rongnung ka liasü. Pai Naga kintem aser political groups den küm 60 tema telemsa agientsü aser olemtep alitsü mapa balala inyaka aruogo.

Pa ya Forum for Naga Reconciliation (FNR) len anir ka aser Naga Reconciliation Commission nung mendenbuba inyakba nisung ka liasü. Pa mapa ajanga Naga teloktem aser Northeast nung kin balala tsüngda olemtep aser putepshiba maparen balala den sendaktepa liasü.



Asür Niketu Iralu ya 1935 küm Phek nung aso. 1955 küm pa Madras Christian College nung azüngdang Initiatives of Change (IofC) taoba mapang Moral Re-Armament ta ajaba den sendaktepa liasü aser Asia Plateau nung director inyak.

Pa Nagaland-i meyipa aruba sülen community-level peace-building, moral leadership aser non-violent conflict resolution asoshi maneni inyak.

Pai yimjung aser putepshitsü

asoshi shilem tajungba agiba ajieta 2018 nung pa nem Rotary Peace Award agüja liasü. Maneni, 2019 nunga Department of Social Welfare, GoN-i pa nem Distinguished Senior Citizens Award agütsüogo.

Asür Niketu Iralu nem 2023 nung Dr Bhupen Hazarika Integration Award agütsü aser iba ya pai Northeast India nung putepa alitsü, sobaliba aser lokti sendakteptsü mapa inyakba ajiteta agütsüba liasü.

November 12, 2025 nü asür Iralu nem IofC Lifetime Achiever Award agütsü aser iba ya pai mapang talangka iba telok den sendaktepa aruba aser peace-building & reconciliation nung shilem agiba atema agütsüba liasü.

Asür Iralu mapa nungi anisungzükbä sülen pa kinungtsü Christine den Sechü Zubza, Kohima nung liyonga aru.

sdcdscdCSO tem akangshitsü atema Workshop ka ayongzüka agisao



Workshop nung shilem agirtem State Commissioner for Persons with Disabilities Tongpang L. Jamir, Secretary SCPD & Jt. Secretary Social Welfare department Theodore Yanthan aser SELCO nungi shisalen sayur aser SCPD ketdangsürtem den tangokba noksa nung angur.

Dimapur, Luroi/August 18 (TYO): Nagaland nung CSO tem akangshitsü, Statutory Compliance, Financial Management aser Organizational Systems dak sendakba nung State Commission for Persons with Disabilities (SCPD) aser SELCO Foundation na longjemer August 18 nü workshop ka ayongzüka agiogo.

Iba workshop ya Nagaland nung organizational governance, statutory compliance, financial management, internal systems aser senotsü teyari agütsüba dak sendakba nung Civil Society Organisations (CSOs) tem inyakyim tashitaitba kümdaktsütsü nükjidong nung ayongzüka agiogo.

Lokti pela agizükba o jembiba mapang Secretary, SCPD & Jt. Secretary, Government of Nagaland, Social Welfare Department Theodore Yanthan-i, SELCO Foundation aser NGO tem pelashishia agizüka liasü. Pai sentong nung shilem agirtem dang iba maongka ya takok tashi agitsü ayongzü. Yanthan-isa, NGO tem dang

parnok tajangshibatam, tetsükdaktsü balala ajangshiba aser lokti tentet tsüngda tawa aliba indang lemsateptsü ajungshi, ajita asünung dang parnok inyakyim temerekba aser tajungba akümtsü, ta ashi.

Sentong nung ojembiba mapang State Commissioner for PWDs Tongpang L. Jamir-i, Nagaland nung bendanga agüja inyakba lokti tentet, NGO aser Disability Persons Organisations (DPOs) tem lir, shirnoki grassroots level nung mokokminertem temeden, tajangzü, lokti nung züngoksemdaktsütsü aser parnok nem tashi agütsütsü atema anibelem mesasai inyakdar, ta ashi.

Ajisüaka item lokti tentettem shirnoki PWD tem libaliro jangja lir parnok senotsü dak sendakba nung maneni tetsükdaktsü tulu ajangshia aruba sasaseta bilemba olen ka pai lemsatep.

Pai ashiba agi, item NGO tem ket nung technical shisatsü tapet, institutional capacity mesüra inyakyim balala aser senotsü tenügdakbatem dak sendakba nung len sayur mali. Jamir-isa, PWD tem

anepalutsü ya State Commission for persons with Disabilities mesüra Department of Social Welfare kija khuret masü saka stakeholder tem ajak khuret lir, ta ashi.

"NGO aser DPO tem institutional aser financial capacity akangshitsü ya organizational tebilemtsü ka dang masü saka iba ya disability rights movement akangshitsü asoshi tongtibang shilem ka lir," ta pai ashi.

Institutional inyakyimtem akangshitsü, statutory aser financial compliance anepalutsü, documentation tajungba kümdaktsütsü aser CSR funding maongkatem agitsü aser lokti tentet sentong tajungba yanglutsüba dak sendakba nung Seven sisters Development Assistance (SesTA) nungi Debasish Achajee-i tangazükba agütsü. Kasa mapang nung CSR Manager, IDAN, Temjenmoa Jamir-i CSR senotsü teyari koda agitsü iba indang onük jembia liasü.

Iba sentong ya State lead, SELCO Foundation Roseline S lenisüba nung agi aser JSO, SCPD Kushem Yemjong-i tepela o jembia liasü.

Mokokchung DC-i Principal Market Yard ketdang asütsü atema board tasen tentettsü

Dimapur, Luroi/August 18 (TYO): Mokokchung Deputy Commissioner, Ajit Kumar Verma, IAS-i, Mokokchung nung Principal Market Yard ketdang asütsü atema Board of Administrators ka officially amenoktsüogo. Teti atema committee ka meshim tashi iba telok yagi shishilemba dak anogoshia inyakyim achaayangtsü.

Nagaland Agricultural Produce and Livestock Marketing Act of 2020 indang guideline tem dak ajemdaker iba jenjang agiogo.

Board tasenba nung Additional Deputy Commissioner, Mokokchung Convenor/Chief Administrator asütsü aser District Agriculture Officer, Dr. Lanunochetla Co-convenor asütsü, Züngsemtem rongnung I. Panger Longkumer

(Chairman, APMC Mokokchung); Temjenmenla (District Horticulture Officer); Dr. Tiachuba Jamir (Chief Veterinary Officer); T. Tatong Longchar (District Fishery Officer); Assistant Registrar of Cooperative Societies, Mokokchung; Asang Aier; Kilangtoshi; Suputoshi; Akangmeren; L. Yanger; Nukshi .I. Ozukum; Bendangukshi Walling; Nathan Ozukum; Mapuakam Kichu; Imrongkumba; Tiarenla; Ojintsungba nung densema lir.

Board aser Board of Administrators inyakyim yamai alitsü:

1. Act kübok First Market Committee tashi aser tinyaktsü latetja aliba ama inyaksangshitsü.
2. Principal Market Yard

kanga junga anepalutsü aser ketdang asütsü asoshi jenjang agitsü.

3. Act kübok provision balala dak ajemdaker shishilemba dak sendakba i n y a k y i m t e m achaayangtsü
4. Market Committee indang records, accounts aser assets tem anepalutsü.
5. Agricultural marketing infrastructure akangshitsü atema inyakyim balala benoktsü.
6. Board ya ADC (H?) Mokokchung kübok inyaksangshitsü.
7. Inyakyim lepa reprangshitsü atema board-i monthly/quarterly basis nung Deputy Commissioner nem inyakyim indang osang agütsütsü.

Urban company-i Beauty & Wellness drive ka tenzükogo

Dimapur, Luroi/August 18 (TYO): Beauty & Wellness aser Spa sector nung tetsürtem nem mapa inyaktsü atema maongka agütsütsü asoshi YouthNet Nagaland den longjemer Urban Company-i recruitment drive ka amenokogo.

Tejangrartem nem registration, ken o ashishitsü aser recruitment inyakyim nung teyari agtsütsü atema YouthNet premises nung Urban Company indang office ka amenoka lir.

August 18 nü YouthNet Nagaland office, Chumoukedima nung osangbenertem den sensaksemba mapang iba osang ya sangdongogo. Ken o dak sendakba nung district-level awareness aser recruitment workshops tem agitsü renema lir.

Workshop atema district aser anogo yamai alitsü:

August 20: Tuensang & Longleng

August 21: Tuensang & Longleng

August 24: Zunheboto & Wokha

August 26: Zunheboto & Wokha

Iba sentong nung tetsür arishi küm 18 nungi 40 tsüngda alirtemi shilem agitettsü.

Maongka balala agütsübatem rongnung angati professional training ita ana

agütsütsüba, senzusenpongtsü atema teyari, sen 40,000 nungi 50,000 tashi aazüktsüba, 100% job placement, Beauty & Wellness aser Spa service tem nung mapa inyaktsü atema maongka agütsütsüba densema lir.

Candidate tem online mesüra offline ajanga screening sütettsü, aser iba ajanga Nagaland kübok tesem ajak nungi tetsürtem recruitment inyakyim nung shilem agitsü asoshi maongka agütsütsü. Recruitment ajanga shimertem Tier 1 yimitem nung inyaktsü asoshi maongka angutsü.

Urban Company koba küm ter dak tema inyaksangshia arudar, iba company yagi YouthNet Nagaland premises, Dimapur nung parnok indang local office ajanga candidate tem nem recruitment inyakyim anasabai bener arutsür. Office ya anepdang 10 ako nungi nikongtsütsü 5 ako tashi lapoker.

Tejangrartemi osang tejangiaba agitsü, züngoksemtsü aser screening inyakyim angatettsü asoshi office semdangtettsü.

Maneni tejangrartemi iba ink: <https://forms.gle/MFZakF7EzaDftA7m7> ajanga form fill sütettsü, mesüra iba number: +917005427394 den tongteprateptettsü, ta kasa sangdong ajanga metetdaktsüogo.

Fazl Ali College nung Freshers' Day sentong aka



Fazl Ali College Mr & Miss Fresher 2026 aser Runners Up parnok külemi tangokba noksa.

Mokokchung, Luroi/August 18 (TYO): Fazl Ali College Mokokchung nung tanü 2026 küm tasen azüngtsü aiterem agizükba Freshers' Day sentong "Chasing Dreams" ta asüba omen nung ajemdaker kaogo. Iba sentong nung Fazl Ali College Principal Dr. I. Wati Imchen aser Fazl Ali College Students' Union General Secretary Sb. Imdangmeren tenati tajungshi o aser tayongzüka o aser ano

tasenpur tenü nung BSc 1st Semester nungi Molongnen Longkumeri jembia aser FACSU Asst. Social Service Secretary Akumzulu Jamiri tepela o jembia liasü.

Tanü iba sentong nung Mr & Miss Fresher 2026 shimteta liasü aser iba nung Mr. Fresher 2026 Mr. Molupong Longkumer (Dept of English) aser Miss Fresher 2026 Miss. Langmai Khumla (Dept. of History) shimteta liasü.

SC-i high-powered panel ka tentettsütsü

New Delhi, Luroi/August 18 (Agencies): Delhi nung kaketshirtemi longkak aitba mapang police temi tashi tali amshiba asadangtsü atema mapa nungi anener aliba obendanger, taoba DGP ka aser ex-CBI director ka den tanga ketdangsür kar densema high-powered committee ka tentettsütsü, ta Supreme Court-i Mongolbarnü metetdaksüogo.

Chief Justice Surya Kant aser Justices Joymalya Bagchi o V Mohana nungeri kümterba bench kati ashiba agi, panel nung tang züngsemtem anioktsü atema tanga teloktem nungi parnok tebilemba angadangba sülen committee tentetba indang Bodhbarnü sangdongtsü.

SC-isa, parnoki July 20 nü kaketshirtem Delhi kübok Parliament leni longkak aita aoba mapang azütokshi lendong atalokba indang video footage aser CCTV recording tem ajak asadangtsü atema high-

powered committee nem agütsütsü atema tetuyuba agütsütsü ta shiogo.

Iba panel yagisa, longkak aitba mapang takoksa ajuruba tetsürtemi tashishibatem benoka alibatem asadangtsü.

Iba bench yagi Solicitor General Tushar Mehta dang kaketshirtemi longkak aitba dak sendakba nung FIR benoka alibatem indang osang tejangja bendantsü metetdaksüogo, koba magi kümdaktsütsü. Okadakisa Constitution Article 142 kübok parnok nem agüja aliba tashi amshitsü ako ta shiogo.

"Iba ya kaketshirtem taküm dak sendaka lir. Asenoki iba ya asadangtsüla. Parnok talangba liyonga aotsü lir. Article 19 kübok longkak aittsü parnok temeden lir," ta bench-i counsel ka dang ashi, shirnoki longkak aitba kaketshirtemi tatok memeshibo ken o temsepa metoktsütsüla ta shia arduar.

Mehta-i ashiba agi, longkak aitba mapang lokti anema inyaksangshir 2,800 dak tema putetogo, shirnok taoba mapanga iba amala inyakyim nung densema liasü, aser July 20 nü longkak aitba mapang item yagi mepetmesü adokdakja liasü.

August 3 nü SC-i, kaketshirtem chioktsü atema tetuyuba agütsüba mapang "criminal antecedents" ta amshiba ya aibelenertem atema amshiba olen ka lir ta jangjatsüogo. SC-isa, ozüng dak ajemdaker kaketshirtem anema benoka aliba tanungba FIR tem ya shibangtsütsü mesüra agintsü akok, ta ashi.

SC-i, taoba mapang police-i tashi talila amshiba mesüra lathi agi azükba ya parnoki longkak aitba ajanga ta meshitettsü, ta ashiba den yimjung nung longkak aittsü asoshi linük temzüng ozüng ajanga temeden agüja lir, ta shisem.

BJP-i UP, Punjab, Gujarat atema in-charge tasen shimogo

New Delhi, Luroi/August 18 (Agencies): National team tasen sangdongba sülen anogo ka lir Bharatiya Janata Party (BJP)-i Mongolbarnü 2027 Assembly election matong tsüngda Uttar Pradesh, Punjab aser Gujarat atema state in-charges tasen sangdongogo.

BJP national tir Nitin Nabin-i, Uttar Pradesh atema Vinod Tawde party in-charge asütsü shimogo aser Jagdish Ishwarbhai Patel co-in-charge asütsü. Dr Satish Poonia, Punjab atema BJP in-charge asütsü aser Tarun Chugh Gujarat atema party in-charge asütsü.

State balala nung election agitsü lia BJP-i lenirtem melenshiba mapang tang item lenirtem ya shimogo.

Hombarnü lenirtem melenshiba sangdongba nung Tawde aser Poonia na nem tongtibang shilem agütsüogo. Tawde national general secretary mapa abentsü atema maneni shimogo aser Poonia-a kasa mapa atema shimogo.

BJP team tasenba nung vice-president 13, general secretary ti aser national secretary 16 densema lir. Party-i lenir tejentem aika meyipa anir aruogo aser lenir

tasentema züngoksemogo.

BJP-i taoba mapang shimer aliba national general secretary Vinod Tawde aser Sunil Bansal na shimshiogo. Secretary tasentem rongnung Harish Dwivedi, Satish Poonia, Gajendra Patel aser Sanjay Bhatia nunger densema lir.

Sangküm küm tetenzüklen Uttar Pradesh election densema assembly election tongtibang kar agitsü lia BJP-i tang lenirtem melenshiogo.

Lenirtem melenshiba nung youth wing, women's wing aser IT cell nunga lenirtem melenshiba densema lir.

Odisha tzümetsüng lendong nung asür 13 jungogo



New Delhi, Luroi/August 18 (Agencies): Odisha tzümetsüng lendong nung ano nisung pongu asüba sülen ajak senteper asür nisung 13 jungogo. State kübok district trok nung tzünglu kanga sashia aruba aser tzümetsüng ajanga nüburtem inyaksangshi nung tetsükdaktsü adokogo aser Mongolbarnü district asem nungbo school tem shibangtsüogo, ta ketdangsürtemi ashi.

Balasore, Bhadrak, Jajpur, Keonjhar, Mayurbhanj aser Kendrapada district tem nung yimtsüng 1,300 nung nisung lakh 7.85 dak tema tzümetsüng agi kongshir lir, ta Special Relief Commissioner's (SRC) office-i

metetdaksü.

Tang nisung pongu asüba rongnung jara ka chirepba nung asüba nisung asem aser tzü nung arakseta asür ana densema lir.

Keonjhar district nung alui oya aliba mapang Bhaktabandhu Mahanta, Ghurudia ayong nung tzümetsüng agi aponger ao. Pa tasü mang ya Patrasahi ghat anasa nguteta liasü.

Jajpur district nung arishi küm 11 tain tebur chanu ka tzümetsüng agi aponger aoba sülen arakset asü.

Balasore district nung jara ka chirepba sülen nisung ana asü aser ana yirua liasü. Kapasuda nung arishi küm 65

tai Radhika Jena aser lar semchir arishi küm 18 tain ka kidanger jara chirepba sülen asü.

Tensa tamajungba küma aoba ajanga Bhadrak, Sundargarh aser Jajpur nung district administrations-i school aser Anganwadi centre tem shibangtsüogo.

Ketdangsürtemi ashiba agi, lendong agi kongshitsü aliba tesemtem nungi nisung lakh 2.77 aninogo. Sorkari relief camp 531 amenokogo aser item camp tem nung chiyongtsü balala sorchioker agütsüdar. Maneni tzümetsüng agi kongshir aliba tesemtemi rescue team 99 yoker lir, ta kasa sangdong ajanga metetdaksü.

Maharashtra SIR: Voter crore 2 dak tema entoktsü imlar

New Delhi, Luroi/August 18 (Agencies): Maharashtra nung electors million 20.70 mesüra 21.16% electoral roll nungi entoktsü akok, kong Mumbai kija nung voter million 10.39 nungi 3.6 million (34.65%) densema lir.

Special Intensive Revision (SIR) nung shilem ka ama field semdanga aoba mapang Booth Level Officers (BLOs) temi item voter tem mebushitetba sülen item voter tem ya agintsüsa kümogo. Maharashtra nung iba inyakyim ya June 30 nü tenzüka liasü.

District tem rongnung Thane indang enumeration rate tajemtiba lir aser electors million 7.45 nungi million 2.86 mesüra 38.41% draft electoral roll nungi entoktsü akok, koba August 24 nü sangdongtsü.

Maharashtra indang Chief Electoral Officer (CEO)-i data ya Mongolbarnü sayaogo. Elector million 97.85 nungi million 77.15 mesüra shilem 78.84% BLO temi semdangba mapang enumerat süogo. Tanungba elector million 20.70 ya kong ali mejangja.

Draft electoral roll sangdongba sülen pei tebilemba lemsateptsü mesüra tashishiba agütsütsü atema elector tem nem ita ka mapang agütsütsü.

Enumeration rates ya yimdak yimtsüngtem nung timba lir. Urbanised district aser yimtitem indang enumeration rate tajemba lir, ta CEO office nungi ketdangsür kati metetdaksü.

Political party aser lokti tentet balalai mepeshiba sülen August 5 nü Election Commission of India (ECI)-i Maharashtra nung enumeration inyakyim atema tanabenbuba August 17 nü tashi mapang atsülangtsü. Iba inyakyim ya July 29 nü tembanga inyaktsü liasü.

Taoba ita mezüngbuba mapang atsülangja August 8 tashi atakzüktsü. House-to-house verification ya August 17 nü tashi agiogo. Tashishiba aser claim balala benoktsü atema August 24 nü nungi September 23 nü tashi mapang lapoktsüogo. Electoral roll tatembangbuba ya October 27 nü sangdongtsü.

May ita ECI-i Andhra Pradesh, Arunachal Pradesh, Chandigarh, Dadra and Nagar Haveli and Daman and Diu, Haryana, Jharkhand, Karnataka, Maharashtra, Manipur, Meghalaya, Mizoram, Nagaland, Delhi, Odisha, Punjab, Sikkim, Tripura, Telangana, aser Uttarakhand nung SIR Phase 3 tenzükba sangdonga liasü.

SANGDONGER

Ni, **Mr. Tepunukshi**, S/o. Lt. Martozung (Changtongya) aser kinungertemi nüburtemi meteta alitsü asoshi iba sangdong agütsür.

Kü kinungtsü Mrs. Chubazenla (Ungma) küna kibong akümdang nungi kati kati memeteti tangar dang sen maputsü jembia liasü. Saka lai ni aser ozü kinungertemi memeteti sen apua arur. Anungji lai lokti aser nüja shirnokdangsa sen apua ali, iba sentsühji ni memetet aser yamaji tanü iba sangdong agütsüba anogo nungi shingaia la nem sen maputsütsü metetdaksür. Kari sen aputsüra, pa/la/iba telok khuret asütsü ta ozü kinungertem lungjemer sangdonger.

Sd/-
(**Mr. Tepunukshi**)

OFFICE OF THE KHAR VILLAGE COUNCIL P.O. Mangkolemba, Mokokchung : Nagaland TENÜNGSANG AGÜTSÜR

Khar Village Council ajanga tekupoklen agüja aliba senso tajungtemi takok jenjang tulu ngutetba tenüngsang tetushi agütsür.

- Sb. Libong Walling, Wb. Watitemjen Walling aser Wt. Aienla-er jabaso, pai NPSC ajanga agiba tatidang nung Secretariat Assistant under Dept. of Personnel and Administrative Reforms takok angu.
- Sb. Suyim Jamir, Asür Matem Jamir aser Wt. Temsümenla Walling-er jabaso, pai NPSC ajanga agiba tatidang nung Social Study Instructor (Allied Instructor) under Labour & Employment, Skill Development & Entrepreneurship Development takok angu.
- Kr. Atongjungla Walling, Asür Rasemliba Walling aser Wt. Chubayangla-er jala, lai Miss Mokokchung 2026 takok korang angu.
- Wb. Bendang Walling, Asür Watimendang aser Wt. Toshilemla Imsong-er jabaso, pai Governors Award for Distinction in the field of Arts (Theatre, Film making & Acting) 2026 takok konang angu.
- Wb, S. Limawati walling, Assistant sub Inspector under office of the Superintendent of Police, Mokokchung, Asür Sentiniken Walling aser Wt. Toshimenla-er jabaso, pai District Commendation Award 2026, 80 buba Independence Day Celebration 2026 nung angu.
- Wt. Bendangsenla, Associate Professor, Fazl Ali College, Mokokchung, Wb. Dr. Lanuchuba Walling kinungtsü, lai District Commendation Award 2026, 80 buba Independeneee Day Celebration 2026 nung angu.
- Mulongso Food Security Group, parnoki Department of Agriculture, Government of Nagaland ajanga Best Farmer Group 80 buba Independence Day Celebration 2026, Mokokchung District Level Exhibition nung takok jenjang angu.

Tsüngremi nenok taküm aser wadang tali moajang aser iba ama takok aser konang tarutsü anogotem nunga moajang ta yimer yimsanger ajak sarasadem.

Sd/-
Limatoshi
Chairman
Khar Village Council

Sd/-
Tareptsüngba
Secretary
Khar Village Council



TIR YIMYIM YIMOBILEM (EDITORIAL)

DIMAPUR WEDNESDAY, AUGUST (LUROI) 19, 2026

BJP-i Nagaland züingshir

India telungjem kübok Nagaland state ya kanga tilaka dang aser BJP telok yabo 'National Party' tuluka, saka state tulutem den kasasa BJP teloki Nagaland züingshiba ya asenok asoshi maongka tuluka lir. Ajisüaka, iba maongkaji asenok aikati pelashishia magizüktettsüa akok, kechiyong tamangba tsütsü asenok ya Khristan aser BJP telok ya Hindu yimsü keta asenba yimten telok ka lir. Atangji, BJP telok nunga tanga yimsü amanger Muslim aser Khristan-tema lir saka parnokji telok tila, ola mali, anungji BJP nung telok tuluba Hindu yimsü dak amangertemi amokbanger alir. Ashi, Nagaland ama state tilaka nungi BJP telok nung mapang mapang shia National Vice President aser Secretary shimbaji teshimertem asoshi dang masü saka Nagaland atema maongka tulu lir. Aji oda, BJP teloki Nagaland nungi BJP National jenjang nung lenir asütsüsa Nagaland nungi shimbaji, Naga nunger dak temulung alemba agi shimer asü ? Mesüra lenirtem dakji temulung lemtetba agi shimer ? Iba kuliji metettsüba agi asenok asoshi kanga tongtibang lir. Atangji, temulung melemtem nungbo pei telok anidaksütsü asoshi shimtsü masüji, lenirtem dakji temulung lemtetba agi shimer, ajisüaka Naga nungertem dakbo temulung alemtsü mali, kechiyong Naga nungertembo center nung kechi government arudir parnoki shimtetba yimsüsürtemi anir iba telok nungji oa adentsü. Ajisüaka, BJP teloki Nagaland nungi National level nung lenirtem shimtsüsa akümbaji, ashiko, Nagaland ya Khristan-temi amokbanger aliba state asüba agi, Khristan-tem mulungjang akoktsü asoshi shimer asütsüa akok. Aji oda, BJP telok nung Nagaland nungi Khristan ka, tongtibang lenir kümdaksüba jagi parnokji Naga nunger mulungjang akoktsü merangba dang masü saka alima tsüngdanga India nung Khristan purtem den putepa alir amai sayur. Ajisüaka, India nung BJP teloki Hindu yimsü dak alaka tanga yimsübo melidaksütsü anem tashi, alimai BJP mapa dak mamangtsü aser parnoki shimakasa, parnok telok nung lenitsü shimba Khristan purtemjia mesademtsü aser pei nübortem tsüngdang tejak metentettsü. Shitakba agibo, yimten o tamangba yimsü na balala benteta bener aotsüla aser linük temzüng nung aliba ama, tamangba yimsü yabo shingaia shinga kangshia amangdaksütsü makok. Ajisüaka, tanü tia majung kaji, BJP teloki tesem aika nung Khristan-tem anema inyakba angur aser joko linük naklo ken nunga Hindu tsüngrem tenüng amshia parnok nem tenüngsang agüja tendi asür. Atangji, aji Hindu nungertem asoshibo tajung saka tangar yimsü amangertemi aji maremer aser magizükteter. Iba ama tensa mapang ka nung, Nagaland nungi Khristan purtem BJP telok nung lenir asütsü shimer süra, item Naga Khristan BJP lenirtem jagi India nung Khristan purtem anemba mapaji yimjak nung aitsütsüla aser Hindu tsüngrem tetshia naklo ken atentsüabajia nokdangtsüla. Tanübo Nagaland nung Naga nungerbo ajak amai Khristan aser Khristan purtemi BJP mapa aitsür saka Nagaland nung BJP teloki yimsü asür. Kasaji, Nagaland nung Mungdang aser arogo lenirtemi anir BJP anemaka, BJP teloki renemba election sentong aser lokti senden nungbo Mungdang aser arogo lenirtem jagi oa sarasademtsür, anungji parnok sarasademji langzüa BJP teloki takok angur südi ta bilemetsüsa ataloker. Ibaji Nagaland nung Khristan lenirtemi bentettsüla. Aji oda, India len BJP teloki Khristan-tem anema inyakba agi, Nagaland nunga Khristan-temi BJP anemli, BJP teloki par telok nung Nagaland nungi nisung ka nem tongti shilem agidaksüli, ano arogo nungertemi BP anemli election nung BJP teloki takok tajungba nguli ta, ashiko, taruba election nungbo Nagaland nung BJP teloki tang dang nungi tatar menden teimba nung takok angutsüa akok.

OLEMSABANG

TEMESHI LAI NUNG ANÜDOKLENTIP (SOUTH) ANÜOLENTIP (NORTH) MEYOKTEPA AMSHIBADEM

~ T. Meren Paul, Kohima

(Yashi adok nungi...)

- A. Temeshi Lai nung South ta zülua alibadem Ao nung meyipzükba.
1. Lipok 12:9 South - Anüdoklentip- shidak, 13:1 South - Anüdoklentip- shidak, 3 South- Anüdoklentip zülua mali, 20:1 South - Anüolentip- tai, 24:62 South - Anüolentip- tai,
2. Anitet 26:18 South- Anüdoklentip- shidak, 35 South - Anüdoklentip- shidak, 36:23 South - Anüolentip- tai, 38:9 South - Anüolentip- tai,
3. Züngdanga 2:10 South - Anüolentip- tai, 13:22 South - Anüolentip- tai, 29 South - Anüolentip- tai, 21:1 South - Anüolentip- tai, 33:40 deleted, 34:3 Southern - Anüdoklentip- shidak, 4 Southern - Anüolentip- tai, 35:5 South - Anüdoklentip- shidak
4. Tazüngkumen 1:7 South - Anüdoklentip zülua mali, 34:3 South - Anüdoklentip zülua mali
5. Joshua 11:16 South -Anüdoklentip zülua mali, 12:3 Southward- Anüdoklentip- shidak, 13:4 South -Anüdoklentip zülüamali, 15:2 Southern- Anüolentip- tai, 7 South- Anüdoklentip- shidak, 8 Southern- Anüolentip- tai, 18:16 South- Anüolentip- tai, 19 South- Anüolentip- tai, 19:8 South- Anüdoklentip- shidak
6. Obendanger 1:9 South- Anüolen - tai
7. I Samuel 23:19 South- Anüolentip- tai, 24 South- Anüdoklentip- shidak, 30:27 South- Anüolentip- tai,
8. II Samuel 24:7 South- Anüdoklentip zülua mali
9. I Putipuyang 9:24 South- Anüdoklentip- shidak,
10. II Putipuyang 4:4 South- Anüdoklentip- shidak, 28:18 South- Anüolentip- tai,
11. I Kings 7: 25 South- Anüdoklentip- shidak,
12. Job 9:9 South- Anüdoklentip zülua mali, 37:9 South- Anüdoklentip zülua mali, 37:17 South- Anüolentip- tai, 39:26 South- Anüdoklentip zülü mali.
13. Tenüngsang Ken 78:26 South- Anüdok- tai, 89:12 South- Anüdoklentip zülua mali
14. Solomon Ken 4:16 South- Anüdoklentip- shidak
15. Isaiah 21:1 South- Anüdoklentip zülua mali, 30:6 South- Anüdoklentip zülua mali,43:6 South- Anüdoklentip- shidak,
16. Jeremiah 17:6 South- Anüdoklentip zülua mali, 32:44 South- Anüdoklentip zülua mali, 33:13South- Anüdoklentipzülua mali.
17. Ezekiel 20:47 South- Anüolentip- tai, 20:46 South- Anüolentip- tai, 21:4 South- Anüolentip- tai,40:2 South- Anüolentip- tai, 24 South- Anüolentip- tai, 27 South- Anüolentip- tai, 28 South- Anüolentip- tai, 44 South- Anüdoklentip- shidak, 45 South- Anüolentip- tai, 41: 11 South- Anüdoklentip- shidak, 42:13 South- Anüolentip- tai, 18 South- Anüolentip- tai,46:9 South- Anüdoklentip- shidak, 47:1 South- Anüdoklen- shidak, 19 South- Anüolentip- tai,
18. Daniel 11:5 South- Anüolentip, tai, 6 South- Anüdoklentip,tai,11 South- Anüolentip,tai, 14 South- Anüolentip, tai,15 South- Anüdoklentip, shidak25 South- Anüolentip, tai, 29 South- Anüolentip, tai,40 South- Anüolentip, shidak
19. Obadiah 1:19South- Anüolentip, tai
20. Zecharia 9:14 South- Anüolentip- tai, 14:4 South- Anüolentip- tai, 10 South- Anüolentip- tai,
21. Luke 12:55 South- Anüolentip- tai, 13:29 South- Anüdoklentip- shidak.
22. Tenyar Mapa 8:26 South- Anüdoklentip- shidak27:13South- Anüolentip- tai,
23. Jungkai Adokba 21:13 South- Anüolentip- tai,

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

SIBS 1985-88 Batch Alumni Reunion sentong Kohima nung agir



SIBS, Bangarapet alumni tem Nagaland nung reunion atema arudang tangokba noksa ka yangi angur.

Dimapur, Luroi/August 18 (TYO): South India Biblical Seminary (SIBS), Bangarapet indang 1985-1988 batch anogo pezü alumni reunion sentong August 16-19 anogotem agir, koba parnok seminary nung lir küm 38 ajungba temaitsü alitsü. Iba reunion ya Koinonia Baptist Church (KBC), Kohima ajanga ayongzüük. Parnok pela agizükba sentong ka August 18 nü Koinonia Prayer Centre, Tsiesema Basa nung 'Bless the Lord, O my soul, and forget not all His benefits' omen nung ajemdaker agia liasü. Koinonia Baptist Church indang Founder aser Senior Pastor aser Kohima Bible College principal, Rev. Dr. Zotuo Kiewhuo-i iba sentong nung jembidang, graduates tem takum yanglushitsüba nung par reju-i tanüla aser academic tsütsü temelenshi bener arutsüba indang lemsatepa liasü. Rev. Kiewhuo-i SIBS nung aliba bilemteta jembidang,

seminary ajanga kakeshirtem bendanga agütsür Yisu Khrista sülen anidaktsü asoshi shilem tulu agiba bilemteta liasü. Azüngba mapang reju indang discipline kanga tesashi asüba yong anidaktsü tasak liasü, saka pei jurila aser tanüla ainba nung teyari tulu liasü ta ashi. Pai taoba principal Frankie E. Dewey nem akhum agütsü, shibai bendanga agütsür kaketshirtem anitet aser mangdang akaba lenir ka liasü, aser pa ajanga alumni aika tanüla nung tashi ulushia takok angu ta ashi. Azüngba mapang kaketshirtemi timtem jenti ajangshia liasü, saka tanübo Tsüngrem nisung kuma India aser aliba tesem balala nung mission wadang balala nung nokdaka lir, ta Rev. Kiewhuo-i ashi. Iba alumni reunion ya Tsüngremi len ania aser moaja aruba bilemtetba mapang ka lir, ta pai ashi. Pai alumni tem dang

Pa yimli asoshi asendenshir inyaktsü aser India aser alima tesem balala nung nüburtem den Tsüngrem osang prokba wadang nung bendanga agütsüshir inyaktsü ayongzüka liasü. Iba pela agizükba sentong nung Meyiengonu Üsou, Evangelist, Koinonia Baptist Church menden liasü aser Medotseilieü Kiewhuo, Pastor, Koinonia Baptist Church ajanga pela agizükba o jembai. Koinonia Baptist Church Women Department ajanga metetpelaba aser sempet agütsüba mapang agia liasü aser Kohima Bible College aser Deborah Group ajanga temeja ken aten. Anogo pezü reunion ajanga taoba mapang külemi azüngertem tanaben ajurutepa takum kuli lemsateptsü aser küm 40 jungnüa ministry aser Tsüngrem tenzüka wadang nung len aniba tenüngsang agütsütsü maongka bener arutsür.

ANOGO ABEN TSÜNGREM DEN

Tasüngdangba Takang - T.Ken 119: 89 - 96.

Alima nung terenemba takang mayur ta nai meteter asü? Yimtenren terenemba aika renemer saka teinyaktetba tera dang alir. Terenemba inyaktsü agütsür saka tebenja teimba adoker. Ano renemshitsü jembir. Kodanga takang terenemba malir. Mapaji yamaji aor süra tekong 89ji reprangang: O Kibuba, teti tatem maka, Nü o kotak nung akanga noktaka lir." Shinga o akanga malir. Kü tebilemba aser amangba ni melenshir.Kodang ni kü o shidak yudir aji tamangtsü lir. Saka Tsüngrem O bo teti akanga akanga lir. Pa O atangji aser tamangtsü lir. Tsüngremi tiyazü jembitsü makok, anungji Pai Pa O nung melenshitsü ta asenoki shisabulua malitsüla. Tsüngremji teti tatem makai atangji lir.Bazar nung, dokan nung teti oset jenjang melenshir. Tsüngrem O bazaar oset amaji masü. Yisui ashi, "Anüng ali suitemtsü, saka kü o tem kecha südanga süitema maotsü" (Matt. 24: 35). Tsüngrem o memelenshir. Tsüngremi o langtepa mejembir. Pai tongmelang agi ashir, " Lemangji ibai lir aser aji yamaji dang alitsü."Pai mapatemji koda bentetter nai metetnera, Pa O ji züngang. Mapatem koda bentettsü Laishiba nung angur. Rara koda bentettsü Tsüngrem O nung ashir, tebilemstsütem koda bentettsü aser temenen nungi koda kümdang alitsü, Tsüngremi ashir. Ajak rong nung tajungtibaji, kotaki koda aotsü Pai Pa O nung ashir.Iba nung ajak bentetter. Yisu Khrista asenok asoshi kangki nung asü, asenok kümzüksü tanaben shia aru aser tamang ajanga Pa dangi arur ajak Pai kümzüker. Mesüngjemtetba taküm nung Tsüngrem O ji tashi aser tesangwa ama alir.Ibai atangji, teti tatem maka aser melenshitsü makok nung asenoki ibai amangtsü akok aser iba ochi O nung alitsü akok. Tsüngremi temenen, tasüba, tekümtet aser teti tatem maka taküm indang tasüngdangba ajak Pa O ajanga bentettsüogo. Nai iba tasüngdangba ne sasa bentettsü akok asü? Tsüngrem O ji züngang aser bushiang.

Court-i Kerala sorkar dang Khristanpur mangatettep nung teka aitsü ashir

Kochi, Luroi/August 18 (Agencies): Kerala nung aliba High Court-i sorkar dang Jacobite Syrian Christian Church nung Syrian Khristan kongsang ana tsüngta küm aika mangatettep aliba nung teka aitsü totuyuba agütsü. Kerala nung aliba Syrian Orthodox Church of Antioch indang kongsang ka nung telemsa adokba ya 1911 nungi lir, koba Orthodox aser Jacobites telok sadang. Küm aika okadak atsütepa aruba sülen India indang Supreme Court-i 2017 obendang nung Jacobite faction-i amokbanga aliba arogo 1,100 dak tema Orthodox faction nem amoktsü. Saka state sorkari iba court totuyuba mapa kuma inyaktsü asoshi mera agidang aikati anema nokdak aser azüdokshi tenzüük. Tang tesüsa August 9 nü telok ana nungi putirtem aser tamangertem Sunday Mass agitsü lia tekülem ki telung nung

raratep, anungji police temi putirtem densema nisung 22 anema ken o benok. Kerala High Court-i August 13 nü obendang agütsüba nung, yimjung nung lidaktsütsü asoshi tetsüngtai aitsü, angatettepdaktsütsü mesüra executive action mesüra legislation tashi amshitsü State mapa lir, ta ashi. Ernakulam aser Palakkad districts nungi ketdangsürtem dang talok ana tsüngta raktepba arogo trok soittsü single judge kati August 30, 2024 nü totuyuba agüja aliba jembishitsü benokba jembidang iba totuyuba ya agütsü. Justice A. K. Jayasankaran Nambiar aser Justice Preeta A. K. indang division bench ajangasa single bench-i item arogotem nem police protection agüja aliba agientsü, aser kibu akumba ya tim civil court ajanga telemtetba magi ta ashi. Tang tasen shima aliba Congress-i aniba provincial sorkari jembishinü tasen

tenzüka mepetmesü angatetteptsü mulungtetba agizük aser sorkar dang state asoshi law and order tebilemtsü akumtsüsa tensa kati marura telok ka nunga madentsü tuyua liasü. Sorkari state indang tematiba court dang, tematiba jenjang nung tangatettep kati arudaktsütsü asoshi mera agitsü aser chief minister-i iba ken o nung temulung agütsür, ta shia liasü. Tang mangatettep aliba arogotem ya Jacobites-i ketdang asür, saka Orthodox faction yagi 2017 Supreme Court obendang nung ajemdaker item arogotem agitsü meranger, kobai item ki o jen ya parnok indang senmang ama obendang agütsü. 2017 nung Supreme Court totuyuba ya 1934 constitution ka nung ajemdaker lir, koba telok ana ya külemi yanglu aser iba sülen anidaktsü mulungtepa liasü. Telok ana ya 1934 küm

ajurutepa common head - Catholicos of the East shima liasü. Ajisüaka ano 1971 nung parnok sadang aser tamangertem züngdangba nung timba aliba tesemtem nung aliba ki o jen tem telok ana yagi agitepa liasü. Tang Orthodox faction indang supreme head ya Kerala nung amenoka lir, aser Jacobites ya Antioch nung aliba tekolakba sülen anidaktsü nangzüka lir. Jacobite kübok aliba arogo 1,100 dak tema nungi Orthodox faction yagi arogo 60 jungnüa agitet. Orthodox temi arogo tali agitsü merangba Jacobites temi anema nokdakba ajanga maneni atsütepa arur. State sorkar tetsüngtai aitsü mela August 13 nü totuyuba agütsüba Jacobite Church-i pela agizük. "Iba obendang ya Arogo asoshi anisüngzüük tulu lir," ta Jacobite Syrian Christian Church indang Catholicos of India nungi Baselios Joseph-i

sangdong ka nung ashi. Baselios Joseph ya Kochi Diocese aser Angamali Diocese indang Metropolitan ama inyaker aser pai yimjung asoshi inyaktsü aliba nung condition kecha makai bhukumer ta ashi aser tangatettep kati aruba ajanga Arogo aser nüburtem ajangzüksü ta ashi. Ajisüaka Orthodox Church nung ajakibo pela magizüker. "Temetetba, onok jaokra yimjung asoshi jembishinüba nung onok adentsü," ta Orthodox Church indang trustee Rony Varghese-i UCA News dang August 16 nü ashi aser High Court indang division bench ajanga ozü temeden wazüka ayutsü totuyuba agütsüba anema ken o benoktsü ta ashi. "Onok jangja-jangja nokdaka lir: 2017 Supreme Court totuyuba sorkari mapa kuma inyaktsüla, koba ajanga mangatettep bentettsüogo," ta pai ashi.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Züngtok

(v) medendaktsü, süktok, mezüngsem (exclude, disenroll)

* Kibalembu nung aibelenertem lokti telungjem nungi züngtok.

Züngtozünga

(v) metsüjangtem azüngba (sowing of seeds)

* Ita takzür dang züngtozünga asütsüla.

OLONG PAITEP # 76023

	1				2	3			
4			5						6
						7			
	8								
	9			10				11	
						12			13
14									
						15			

TIPIEN

2. Sü jeplok - (4)
 4. O agi merenshi - (5)
 7. Ayongküm li - (5)
 8. Chiyungtsü mapang süiadok - (4)
 9. Tsüngrem den jembiba - (9)
 12. Saklok - (4)
 14. Samaba mebushitet - (5)
 15. Mejanga onü - (5)
 16. Tzü shiruru ka - (4)

LANGTSÜNGLEN

1. ____ i - (4)
 3. Kasa masü - (6)
 5. Nüchi masü - (5)
 6. Tashi endok - (5)
 9. Langtem - (5)
 10. Anü malidang - (6)
 11. ____ kibur - (5)
 13. Tebur tembar tsüngda jatepba - (4)

OLONG PAITEP # 7602 TELANGZÜBA**TIPIEN :**

1. Yiar, 3. Tesola, 7. Yimra,
 8. Tangar, 9. Peria, 10. Tanur,
 11. Tasen, 13. Lemjem, 15. Tambu,
 16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,
 5. Alaka, 6. Satan, 9. Putet,
 10. Tembar, 11. Tatok, 12. Amang,
 14. Jala.

NAI-A YA METETTER

United States kübok New Jersey nung alir Indian-American nungeri Guinness World Record tasen ka yangluogo. 80 buba Indian Independence Day aser United States 250 buba küm ajungba nüngtem nung parnoki "Largest Flagpole Number" otsü yanglutetogo.

Consulate General of India, New York-i Federation of Indian Associations (FIA) den külemi New Jersey nung otsü tasen ka yangluogo ta Consulate General of India-i metetdaktsüogo.

Shillong kübok Laitumkhrah nungi roadside vendors 86 anien**Shillong, August 18, 2026**

(Agencies): Shillong kübok kanga dang mazüangi aliba Laitumkhrah area nung August 17, 2026 nungi traffic tayongba kümogo, kechiyong ketdangsürtemi roadside hawkers aser vendors 86 tashi anienogo.

Shillong ketdangsürtemi

roadside vending tip atemtsü aser mazüngba tesemtem nung lenmang tesadamba akümstü maparen inyakba nung iba ya shilem ka lir.

Laitumkhrah nung roadside hawkers aser vendors ajak Dhankheti aser

Brightwell Bungalow nung designated vending spaces-i belenogo.

Shishilembartemi amalitepa tesem belenogo ta Shillong Municipal Board CEO PK Boro-i ashi.

"Ajak renemogo, ajak inyakogo. Hawkers-i tetuyuba sülen anidaker aser tashi angar" ta Boro-i ashi.

Tesem tasentem nung vending stalls ya trade-wise draws ajanga lezmüksü aser iba ya parnok ajak tawa kasasa ngudaktsütsü mechi nung inyakba lir.

Hombarnü iba mapa inyakdang police personnel, Dorbar Shnong züngsemtem aser Municipal Board ketdangsürtem liasü. Iba mapang East Shillong MLA M Ampareen Lyngdoh liasü.

Laitumkhrah aser Fire Brigade temeket nung küm aika roadside vending points lapoka arurtem atema iba ya temelenshi tulu ka lir.

Assam nung Youth Welfare and Empowerment department tentetstü**Guwahati, August 18, 2026**

(Agencies): Assam sorkari Department of Youth Welfare and Empowerment ka tentetstü aser iba ajang lanurtem dak temulung agüja maparen inyaktsü.

Hombarnü Lok Sewa Bhawan nung Chief Minister Himanta Biswa Sarma-i iba osang metetdaktsü. "Iba department ajanga Assam lanurtem welfare, development aser empowerment nung temulung agütsütsü" ta CM Sarma-i ashi.

"Assam sorkar nung lanurtem asoshi department balaka maliasü. Onoki Department of Youth Welfare and Empowerment tentetstü lemtetogo" ta pai ashi.

Iba department nung tang

agencies aser government departments balalai inyakba maparen ajak bener arutsü.

Education Department aser tanga department tem nung National Service Scheme (NSS), National Cadet Corps (NCC), Employment Exchanges aser youth welfare initiatives ajak iba department tasenba kübok aittsü.

"Assam sorkari September 17 nü iba department tenzüksü alizüng lir. Directorate amenoktsüba dena preparatory work inyakdar" ta CM Sarma-isa metetdaktsü.

CM Sarma-isa Project Sadbhawana indang metetdaktsü aser iba ya administrative reform initiative ka lir.

Mapang talangka government files bendena alibatem bentetstü aser maparen ochishia aser ashishitep melii inyaka aotsü atema Project Sadbhawana sentong agitsü.

Iba sentong ya October 2 nungi January 31 tashi alitsü aser Assam e-file system amshia ken o mebenteti alibatem bushitsü aser item ken o bentetstü asoshi ketdangsürtem jangjatsü.

Government departments, directorates aser Deputy Commissioners' offices nung files lakh 3 tema bendena lir ta CM Sarma-i ashi.

2021 nungi backlog merüktetstü merang saka manual record-keeping ajanga tetsükdaktsü ajuru ta pai ashi.

GOVERNMENT OF NAGALAND**DIRECTORATE OF ANIMAL HUSBANDRY & VETERINARY SERVICES****NAGALAND: KOHIMA****NO. VET/EXTN/VFA-10/2026-27/****Dated Kohima the 17th August 2026****DECLARATION OF RESULT (WRITTEN EXAM)**

The Department of A.H. & Veterinary Services conducted the written examination for selection of the candidates to undergo 30th batch VFA training during 2026-28. The following candidates have been selected for appearing the oral examination scheduled to be held on the 27th & 28th August 2026 at the Conference Hall, Directorate of A.H. & Veterinary Services, Kohima, Nagaland from 10 AM onwards. The schedule for interview will be as follows.

Roll No. 6 - 184 on 27.08.26, Roll No. 192 - 411 on 28.08.26.

The candidates are required to bring the ADMIT CARD and the ORIGINAL DOCUMENTS from HSLC exam onwards, Scheduled Tribe, Indigenous & Backward Tribe certificate.

ROLL NUMBERS

6	11	16	17	19	21	23	24	25	27
28	29	30	31	35	36	38	44	45	46
51	52	56	58	62	66	67	68	71	73
82	86	91	93	97	105	110	111	114	116
117	120	122	123	124	125	126	127	132	133
135	136	140	141	148	151	157	158	161	167
168	169	171	174	175	176	179	180	183	184
192	194	197	200	201	202	205	207	208	209
211	214	215	217	219	226	227	233	234	240
241	242	245	248	250	251	253	256	259	263
268	269	274	276	277	278	283	285	289	290
306	317	318	322	323	326	328	335	339	342
345	347	350	355	359	367	370	372	373	377
381	382	384	394	395	397	407	409	410	411

(DR. KUOKEHEBI GWIRIE)**Director**

**Animal Husbandry & Veterinary Services
Nagaland, Kohima.**

GOVERNMENT OF NAGALAND
DIRECTORATE OF NEW & RENEWABLE ENERGY
NAGALAND : KOHIMA

NO.DNRE-NERC-CORR/15/2025

Dated Kohima the August 2026

PUBLIC NOTICE

This is to notify to all the Consumers & Stakeholders of the State of Nagaland that the Department of New & Renewable Energy has filed a petition for Generation Tariff Determination of **5 MW Solar Power Plant (Phase-II) at Hovukhu Village, Niuland** before the Nagaland Electricity Regulatory Commission (NERC) on 15th Dec. 2025. The Commission has admitted the petition on 22nd July 2026 and numbered as Case No. 04/2026-27.

The Summary of DPR and Tariff Proposal are as below:

Executive Summary

- * Generator : Department of New & Renewable Energy
- * Capacity : 5MW
- * Stages of development : 2nd Phase
- * Capacity Utilization Factor : 21%
- * Gross power generation : 8.87 MU/Year
- * Loan Term : 15 Years
- * Debt Equity ratio : 70:30
- * Nearest Sub-Station : Niuland Sub-Station, Niuland

Estimation Proposed on cost & finance

SI No	Components/Services	Amount (Rs. In Lakhs)
1	Supply, Installation, Erection and Commissioning of Solar PV Modules	2103.55
2	Module Mounting Structure and associated Civil Works	276.39
3	Supply, Installation, Erection & Commissioning of Inverters, control room and associated civil works	207.07
4	Evacuation Cost up to Interconnection Point (Cables, Transformer, Switch gears etc. with associated civil works)	235.88
5	Upgradation of 33/11KV transmission Line from Plant to Niuland,Construction of Switch yard and upgradation of Switch Yards and Transmission Line at Site	225.04
6	20KW Off Grid Solar Power Plant for power supply	76.81
7	Preliminary works, approach road temporary housing	41.96
8	Water supply facility	82.30
9	Permanent Civil Works	224.95
10	Construction of RCC Bridge 15 M Span over River DADA on Foot Hill road, near Hezho village, Niuland	226.00
Total Capital Cost		3700
Proposed Tariff		5.90/KWh

- Interested parties may peruse the said DPR and tariff proposal from office of the Directorate of New & Renewable Energy, Kohima, Nagaland on payment of Rs. 100/- per petition or can download from the NERC's Official website i.e www.nerc.org.in .
- Objection/ suggestion, if any on the DPR and tariff proposal submitted by the developer through the state government, together with supporting materials may be filed before the Secretary, NERC, near E-n-C Office, Department of Power 'Electricity House', A.G colony, Kohima in person or through registered post so as to reach the commission on or before **07th Sept. 2026**.
- The public Hearing on the above matter shall be as per the date, time and venue decided by the Hon'ble Commission in due course of time.

Sd/-
Director
New & Renewable Energy
Nagaland: Kohima

GOVERNMENT OF NAGALAND
DIRECTORATE OF NEW & RENEWABLE ENERGY
NAGALAND : KOHIMA

NO.DNRE-NERC-CORR/15/2025

Dated Kohima the August 2026

PUBLIC NOTICE

This is to notify to all the Consumers & Stakeholders of the State of Nagaland that the Department of New & Renewable Energy has filed a petition for Generation Tariff Determination of **5 MW Solar Power Plant at Teichuma Village, Kohima** before the Nagaland Electricity Regulatory Commission (NERC) on 15th Dec. 2025. The Commission has admitted the petition on 22nd July 2026 and numbered as Case No. 05/2026-27.

The Summary of DPR and Tariff Proposal are as below:

Executive Summary

- * Generator : Department of New & Renewable Energy
- * Capacity : 5MW
- * Stages of development : 1 Phase
- * Capacity Utilization Factor : 21%
- * Gross power generation : 8.87 MU/Year
- * Loan Term : 15 Years
- * Debt Equity ratio : 70:30
- * Nearest Sub-Station : Zhadima Sub-Station, Kohima

Estimation Proposed on cost & finance

SI No	Components/Services	Amount (Rs. In Lakhs)
1	Supply, Installation, Erection and Commissioning of Solar PV Modules	1970.52
2	Module Mounting Structure and associated Civil Works	236.46
3	Supply, Installation, Erection & Commissioning of Inverters, control room and associated civil works	203.93
4	Evacuation Cost up to Interconnection Point (Cables, Transformer, Switch gears etc. with associated civil works)	221.44
5	20KW Off Grid Solar Power Plant for power supply	64.19
6	Preliminary Works and Site Investigation etc.	89.83
7	Water Supply facility	84.94
8	Permanent Civil works	460.25
9.1	Construction of 33KV Transmission line from 5MVA Solar power plant to 132kV Zhadima/Teichuma Sub-station.	102.05
9.2	Construction of 33KV bay at 132KV Zhadima Sub-station.	63.21
9.3	Metering for Grid Import/Export at 132KV Zhadima Sub-Station	3.14
10	Total Capital Cost	3500
Proposed Tariff		5.58/KWh

- Interested parties may peruse the said DPR and tariff proposal from office of the Directorate of New & Renewable Energy, Kohima, Nagaland on payment of Rs. 100/- per petition or can download from the NERC's Official website i.e www.nerc.org.in .
- Objection/ suggestion, if any on the DPR and tariff proposal submitted by the developer through the state government, together with supporting materials may be filed before the Secretary NERC, near E-n-C Office, Department of Power, 'Electricity House', A.G colony, Kohima in in person or through registered post so as to reach the commission on or before **07th Sept. 2026**.
- The public Hearing on the above matter shall be as per the date, time and venue decided by the Hon'ble Commission in due course of time.

Sd/-
Director
New & Renewable Energy
Nagaland: Kohima

OFFICE OF THE
SENPO JAMIR TELONGJEM
CHUCHUYIMPANG, MOKOKCHUNG - 798601

TENÜNGSANG AGÜTSÜR

Senpo Jamir Telongjem, Chuchuyimpang ajanga Wb.Moasangba Jamir aser Wt. Alemsangla tena jala, **Wt.Mapusenla Jamir**, Assistant Horticulture Officer, Dimapur District Award ngutetba asoshi la nem tenungsang tetushi agütsür. Iba konang tetushi ya, nai nübur aser sorkar tenzükbä wadang nung nendaka inyakba kuli tajung lir aser ano tarutsü nunga, wadang balala ajak nung temelung aguja inyaktsü ajungshir.

Ne taküm aser wadang ajanga onok tsürabur aser adianutem ajak temoatsü angutsü maneni yimlaseta atar.Tsüngremi ne wadang ajak nung moajangma.

Sd/-
(Y AKUM SENPO JAMIR)
Tir

Sd/-
(L CHUBA)
Tongti Zülur



ASÜKU TEPELA LEMSATEPER



Onoki teti meima aliba tsürabur aser otsüla asür **Mrs. P Moakala** W/o Lt. Imnasashi (Khensa Village) iba alima nungi pila aoba asüku khuret den yariteba atema lar Chirnur aser Semchirseamnuri, kija kibong, lokti, Arogoi anir ana aser talang nungi tembar temeimer ajak-i teyari tulu den sarasadem agi onok mangyim nung nungita yariba tepela tulu lemsateper.

Asen teyanglur Tsüngremi nenok kija aser kibong wadang ajak nung temoatsü tulu agujangma ta onoki sarasademsür .

Asür Mrs. P Moakala (Retired Staff Nurse)
Chirnur, Semchir aser Adianutem
Yimyu Ward , Mokokchung

Imran Khan mozü kidangi anir
aotsü Supreme Court-i tuyuogo

Islamabad, Luroi/August 18

(Agencies): Mongulbarnü Supreme Court of Pakistan-i taoba ato kilonser Imran Khan ya tepuokdak nungi mozü kidangi anir aotsü totuyuba agütsüogo, ta par Pakistan Tehreek-e-Insaf party ajanga ashi, koba par party aser kinunger temi mapang talangka nungi khanga aruba ataloktsür asütsü.

Cricket asayar nungi yimten yimsüsür akumsang arishi küm 73 tain Khan ya ken o balala nung aija August 2023 nungi tepuokdak yua lir, saka item ken o ya pa 2022 küm atsüngdokba sülen yimtenren tsütsü nungi tenük yokba lir ta pai ashir.

Taoba küm par jabaso temi aiben pa temang mejungi akumba indang tebilemtsü lemsatep aser par okatsüria pa tepuokdak lia tenük achichilen kanga mejungi kumogo ta shia liasü.

"Iba totuyuba ya pela agizüker aser tekeraba nung ataloktsü imlar, kechiaser pa tenük aser temang yamai majung mekumi lila," ta PTI odongtar Zulfikar Bukhari-i ashi.

"Doctor tem ajunga temulung süa makum tashi pa

mozü kidang alitsüla," ta pai ashi.

Court-i Khan ya ghonda 48 tsüngta Shifa international Hospital-i anir aotsü aser September 16 tashi yangji ayutsü totuyuba agütsü, ta Khan asoshi odongtar Naeem Haider Panjutha-i X nung ashi.

No-confidence vote ajanga pa yimsüsüba menden nungi anenba sülen sorkar nem sempet agütsüba aser ozüng alema kibong akumba densema ken o aika pa anema benok. Temerenshi kar agientsü aser kar meyiphshitsü aser kar ano mejembi lir. Pai aibelen mapa meinyak ta ashir.

India nungi densema alima tesem balala nungi cricket asayar mongin temi February ita Khan tajungba nung anepalutsü takhangba agüja liasü aser pa tepuokdak jenjang majungba indang tebilemtsü lemsatep.

PTI-i 2018 election nung takok angu aser tongtipang provinces tem nunga parnok bhukumer jenti liasü. Saka 2024 election agitsü lia par election symbol agienja candidates tem independents ama toktepa liasü.

Divya, Tejaswin, Gayatri nunger nem Arjuna Award agütsütsü



Luroi/August 18, 2026 (Agencies): Sports Ministry-i Mongolbarnü 2025 küm atema Dhyam Chand Khel Ratna award shinga nema magütsütsü telemtetba agiogo, aser selection committee-i ita trok tejakdang benokba asayar list asadangba sülen asayar 17 nem dang Arjuna award agütsütsü agizükogo.

Hockey asayar Hardik Singh, linük nung asayartem nem agütsüba tetushi tematiba atema recommend asü saka magizük.

2014 küm sülen tang mezüngbuba asayar shinga nema Khel Ratna magütsütsü.

Arjuna Award atema shimertem rongnung World Cup koker aliba chess asayar Divya Deshmukh, decathlete aser high jumper Tejaswin Shankar aser badminton asayar Gayatri Gopichand nunger densema lir.

Grandmaster Vidit Gujrathi, Treesa Jolly, Glasgow Commonwealth Games silver medallist boxer Narendra

Berwal aser deaf shooter Dhanush Srikanth nungera list nung densema lir.

Selection committee-i taküm Arjuna Award atema asayar 24 tenüng agütsü, saka kanga temsü aliba asayartem nem dang iba tetushi agütsütsü atema kanga junga asadangba sülen asayar 17 dang shimogo.

Taküm iba list nung cricket asayar ka danga densema mali. 2023 küm fast bowler Mohammed Shami nem iba tetushi agütsüba sülen cricket asayar kati danga iba award agizüka mali.

Ministry-isa, Dronacharya Award agizütsüpur nisung asem tenüng sangdongogo, kong Boxing coach Chhote Lal Yadav densema lir.

Maneni Lifetime Achievement category nung tebur national team coach Dharmendra Yadav aser wrestling coach Virender Kumar nata shimogo.

Khel Ratna atema medallion ka, kuli kakat aser senpet sen

lakh 25 agütsür, aser Arjuna Award atema senpet sen lakh 15 agütsür.

Arjuna Awards: Tejaswin Shankar (Athletics), Priyanka Goswami (Athletics), Narendra (Boxing), Vidit Gujrathi (Chess), Divya Deshmukh (Chess), Dhanush Srikanth (Deaf Shooting), Rajkumar Pal (Hockey), Surjeet (Kabaddi), Rudransh Khandelwal (Para-Shooting), Ekta Bhan (Para-athletics), Arvind Singh (Rowing), Akhil Sheoran (Shooting), Treesa Jolly (Badminton), Gayatri Gopichand (Badminton), Lalremsiami (Hockey), Muhammed Ajmal (Athletics), Pooja (Kabaddi).

Arjuna Award (Lifetime Achievement): Shri I Arumainayagam (Football)

Dronacharya Award: Parveer Singh, Chhote Lal Yadav, Neha Chavan

Dronacharya Award (Lifetime Achievement): Dharmendra Yadav, Virender Kumar.

Barcelona-i Rodri atema £65m agütsütsü mulunga agizükogo

Luroi/August 18, 2026 (Agencies): Barcelona-i Spain captain Rodri, Manchester City nungi pound million 65 shi agi alizütsü mulunga agizükogo.

Arishi küm 30 tain shibai 2024 küm Ballon d'Or nguogo, pa Barca den küm pezü atema tenangzüktepba yanglutsü renema lir.

Transfer ya anogo ishika tsüngda tembanga inyaktepsü imlar.

2019 küm Atletico Madrid nungi pound million 62.8 agi City nung adenba sülen Rodri iba club nungi 298 ben asaya aser iba mapang takok aika ngutetogo.

2024-25 nung pa temekok yiruba ajanga mapang talangba ka masayatet aser taoba season-a hamstring yiruba ajanga tatemlenbo masayateti lasü.

Ajisüaka pai meyipa arur taküm World Cup nung kanga junga asaya-a Spain team takok

dangi ani, aser pa nem player of the tournament naroküm agütsü.

Premier League titles pezü, FA Cup ana, EFL Cup asem aser Champions League ka densema tongtibang asayamung 12 akokba sülen Rodri-i City toktsür.

Taoba hopta Barca-i Rodri atema pound million 38.5 agütsütsü benokdangba City-i magizüki lasü.

Pa Real Madrid nung oa adentsü akok ta bilema lasü, saka La Liga nung parnok anemer Barcelona-i tawa pa alitsü atema jenjang talila agia lasü.

Deobarnü Community Shield nung Arsenal pur makokba sülen jembiba mapang coach tasenba Enzo Maresca-i, "Rodri ya tawa-ang World Cup aser Ballon d'Or akokba asayar ka lir. Pa ya temaba jenjang nung asayaba asayar ka aser team ajak nung

Rodri ama asaya ka nüngdaker," ta ashi.

Kasa mapang nung City pur arishi küm 18 tain Ayyoub Bouaddi alizütsü meranga arudar. Osang ajanga ashiba agi club-i Morocco nunger asayar den ya sensaksemogo. Pa ya pound million 85 shi agi alizütsü.

Lille nungi taoba season kanga junga asayaba den taküm World Cup nung kanga junga asayaba sülen Bouaddi ya ajaki aginüba asayar ka kümogo.

Bouaddi ya Rodri asayaba yimya nung asayar aser pa alizükra pai Anderson nem teyari agütsütettsü, shiba box-to-box midfielder ka lir.

Bernardo Silva, Tijjani Reijnders aser Rodri nunger ajaki club toktsüba sülen City pur parnok melentsü atema asayar bushidar, aser parnok asoshi Bouaddi ya tapet asütsü ta bilemer.

Cincinnati Open: Zverev-i takok angu; Williams adianu tsükogo

Luroi/August 18, 2026 (Agencies): ATP-WTA Cincinnati Masters nung top seed Alexander Zverev-i tasembuba round kokogo, saka Serena aser Venus Williams nabo mezüngbuba tarep asaya nung tsükogo.

Germany nunger asayar Zverev, shibai taküm Roland Garros ako aser Wimbledon nung tanabuba jenjang nung tembanga lasü, pai Terrance Atmane 7-6 (7/4), 7-6 (8/6) agi koka lasü.

Tetsür tarep asaya nung Serena aser Venus Williams nati America tsür Payton Stearns aser Ukraine tsür Marta Kostyuk na 6-2, 1-6, 10-8 agi mekoki lasü.

Kasa asayamung tebur kija asaya nung fifth seed Alex de Minaur-i Arthur Fery 7-5, 7-6 (7/3) agi kokogo.

Pa taruba asaya France nunger Arthur Fils den asayatsü, shibai Czech nunger ninth seed Jiri Lehecka 6-1, 6-7 (7/9), 6-3 agi tsükdaksüogo.

Spain nunger asayar Rafael

Jodar-ia Chile nunger Alejandro Tabilo amokbanger asaya-a 6-2, 6-1 agi asaya kokogo aser pa taruba asaya Roland Garros finalist Flavio Cobolli den asayatsü.

Italy nunger asayar yagi tasembuba set nung game ka mekoki aliba nungi meyipa tur Alexander Blockx 7-5, 4-6, 7-5 agi kokogo.

Maneni Argentina nunger asayar Thiago Tirante, shibai tanabuba round nung Novak Djokovic tsükdakja lasü, pai Spain nunger asayar Martin Landaluce 7-6 (7/5), 7-6 (7/4) agi kokogo.

Tetsür kija asaya nung Grand Slam ana koker alila Elena Rybakina-i, Magdalena Frech 6-4, 7-6 (7/2) agi kokogo.

Ano taoba mapang world number one asayar aser defending champion Swiatek-i kanga meranga asayar Maria Sakkari 4-6, 6-1, 6-1 agi kokogo.

2024 finalist Pegula-ia US tsür Emma Navarro 7-5, 6-2 agi kokogo.

Amar Dedic Newcastle nung denogo



Luroi/August 18, 2026 (Agencies): Newcastle United-i Benfica nungi defender Amar Dedic pound million 30 shi agi alizükogo.

Hombarnü temang tendangba sülen Dedic-i Newcastle United den küm pongu atema tenangzüktepba yangluogo.

Newcastle nung adenba sülen pa manager Matthias Jaissle den longjemeogo. Tena 2023 küm Red Bull Salzburg nung külemi inyaka lasü.

"Newcastle United nung adenba atema jangradema bilemer aser iba ya tetushi tulu lir," ta pai Mongolbarnü iba club nung adenba sangdongba sülen ashi.

"Ni iba club nung adenba atema kanga pelar aser club aser fan tem atema asaya tenzütsü yongyaseta atar,

"Matthias den tanaben inyaksü tanaben maongka anguba ajanga ni iba telemtetba agiba nung yariogo. Küna kati ka kanga junga metettepa lir. Ni koma asayatettsü aji pai meteta lir, aser pa atema tanaben

asayatsü maongka anguba atema kanga pelar.

"St James' Park nung Premier League football asayatsü ya balaka asütsü. Asaya ajak ya tongtibang asaya ka ama bilemer. Ni asaya tenzütsü atema matateter," ta Dedic-i ashi.

Kieran Trippier-i club toktsür Wolves nung adenba sülen Newcastle pur right-back tasen ka bushia lasü.

Tino Livramento temola yiruba tang tashi taneptsü monguteti lir asünung Dedic ya Deobarnü Liverpool den mezüngbuba asaya atema team nung anioktsü akok.

Kasa mapang nung Jaissle-ia, Dedic den tanaben inyaksü yongyaseta ataba lemsatepogo.

"Pa ni kanga junga meteta lir, kechiyong ni pa den tanur asüadang nungi Austria nung külemi inyakogo aser pa indang career repranga aruogo. Pa kanga athletic, aggressive aser technical asayar ka lir aser ano maneni renloka aotsü sempet lir," ta Jaissle-i ashi.

BILEMDANGANG

"Takok nguneri kodanga matsükshir."